

DOMIGU XIV TEMPU KOMÚN – TINAN B

Tema Domingo XIV tempu komún

Liturjia domingu ne'e nian hatudu katak Maromak bolu ema nafatin atu sai sasin iha mundu kona-ba ninia projetu salvasaun nian. La interese se ema sira-ne'e fraku no limitadu; Maromak nia kbiit hatudu liuhusi frakeza no fragilidade instrumentu umanu sira-ne'e ne'ebé Maromak hili no haruka. *Leitura dahuluk* apresenta mai ita estratu ida relatu vokasaun Ezequiel nian. Vokasaun profétika iha-ne'ebá apresenta nu'udar Jahwéh nia iniciativa, ne'ebé bolu ema nia oan ida / “*filho de homem*” (katak, ema “normál” ida, ho ninia limite no fragilidade sira) atu sai, iha povu nia leet, Maromak nia lian.

Iha leitura daruak, Paulo asegura sarani sira Korintu nian (hodi fó ezemplu pesoál) katak Maromak atua no manifesta ninia kbiit liuhusi instrumentu fraku no limitadu. Iha apóstolu nia asaun, hodi moris iha kondisaun finitude nian, vulnerabilidade nian, frakeza nian – bele hatudu ba mundu no ba ema sira Maromak nia kbiit no vida.

Evanjellu, hodi hatudu oinsá ema sira husi nia rai Nazaré simu Jezús, afirma filafali ideia ida ne'ebé mosu mós iha leitura rua seluk domingu ne'e nian: Maromak manifesta An ba ema iha frakeza no fragilidade. Bainhira ema sira rekuza atu entende realidade ida-ne'e, fasil liu ba sira atu lakon oportunidade atu deskobre Maromak ne'ebé mai hasoru sira no hakohak dezafiu sira ne'ebé Maromak apresenta.

LEITURA I – Ez 2,2-5

AMBIENTE

Ezequiel, “profeta esperansa nian”, ezerse ninia ministériu iha Babilónia iha Judeu sira ne'ebé desterra iha-ne'ebá nia leet. Profeta Ezequiel halo parte grupu dahuluk desterradu sira nian, iha 597 mK, bainhira Nabucodonosor deporta sira ba Babilónia.

Faze dahuluk ministériu Ezequiel nian hala'o entre 593 mK (data ninia xamamentu ba vokasaun profétika) no 586 mK (data iha-ne'ebé Jeruzalém monu ba dala rua iha ezérsitu Nabucodonosor nia liman no lori grupu foun seluk ba Babilónia). Iha faze ida-ne'e, profeta preokupa atu halakon esperansa falsu desterradu sira-nian (katak sira-nia ezíliu sei remata iha tempu badak no bele fila ba sira-nia rain) no atu denuncia infidelidade barabarak ba Jahwéh husi membru Povu Judeu nia parte ne'ebé eskapa iha ezíliu dahuluk no hela iha Jeruzalém.

Faze daruak ministériu Ezequiel nian hala'o hahú husi 586 mK no prolonga to'o besik 570 mK. Hela iha rai estranjeiru ida, la soi Templu, amlulik no kultu, desterradu sira monu iha deziluzoan no duvida kona-ba Jahwéh no kompromisu ne'ebé Maromak asume ho nia Povu. Iha faze ida-ne'e, Ezequiel buka hamoris desterradu sira-nia esperansa no tatoli ba Povu serteza katak Maromak maksoin no libertadór la hakribi no la haluha ninia Povu.

Testu ne'ebé propoin ohin nu'udar leitura dahuluk halo parte relatu vokasaun Ezequiel nian (kf. Ez 1,1-3,27). Depoizde deskreve Maromak nia manifestasaun, iha kuadru ida ne'ebé apresenta karakteristiká espesiál sira teofania nian (kf. Ez 1,1-28), profeta apresenta diskursu ida iha-ne'ebé Jahwéh define misaun ne'ebé atu konfia ba nia (kf. Ez 2,1-3,15). Epizódiu ne'e situa iha “tinan da-5 liurai Joaquin nia dadur”, “iha Caldeia, iha mota Cabar nia ninin” (Ez 1,2). Ne'e la'ós informasaun biográfika ida... Ida ne'e hakarak de'it hatudu – hodi uza linguajen tempu ne'ebá nian no prosesu típiku literatura época nian – katak profeta simu misaun ida husi Maromak no nia ko'alia no halo hodi Maromak nia naran.

MENSAJEN

Ita-nia testu apresenta elementu típiku relatu vokasaun nian no halo parte ba istória hotu vokasaun nian.

Uluknanai testu sujere katak, vokasaun profétika mak Maromak nia planu ida. Ita-nia testu antesipa ho (kf. Ez 1,1-28) manifestasaun solene Maromak nian. Hafoin. Profeta rona “lian” ida bolu nia (vers. 2) no revela ba Ezequiel atu ko’alia ba Povu rebelde ne’e ne’ebé ba kontra Maromak. Iha mós referénsia ida ba “espíritu” ne’ebé tama iha profeta no halo nia “hamriik”; tuir reflesau judaika, Maromak maka komunika kbiit – ninia “espíritu” – ba sira ne’ebé nia hili atu haruka salva nia Povu, hanesan juíz sira (kf. Jz 14,6.19; 15,14), liurai sira (kf. 1 Sam 10,6.10; 16,13) no profeta sira (iha Ezequiel, “espíritu” ne’e mosu nu’udar manifestasaun maka’as Maromak nian, ne’ebé tama iha nia no destina nia ba nia servisu). Vokasaun nafatin Maromak nia inisiativa no la’ós ema nia hilin.

Maromak maka bolu Ezequiel no foti nia ba ninia servisu.

Iha fatin daruak, mosu ideia katak xamamentu dirije ba ema ida/mane ida. Iha-ne’e Ezequiel simu naran “ema nia oan/filho de homem” (vers. 3) – espresaun ebraika ne’ebé signifika simplesmente “ema liga ho rai, fraku no mortál. Maromak bolu ema frajil no limitadu, la’ós ema estraordináriu, delikadu, ho kapasidade la’ós baibain nian... Buat ne’ebé desizivu la’ós kualidade estraordinária profeta nian, maibé Maromak nia bolun no misaun ne’ebé nia entrega ba nia. Indignidade no limitasaun, típika “ema nia oan nian”, la sai obstákulu ba misaun: eleisaun divina fó ba profeta autoridade, biar ninia limite umanu sira iha.

Iha fatin datoluk, ita iha definisaun misaun nian. Ezequiel, nu’udar profeta, hetan mandatu atu bá Povu rebelde ida, ne’ebé nafatin hadook an husi Jahwéh nia dalan sira. Ninia misaun mak apresenta ba Povu ida-ne’e Maromak nia proposta sira. Buat importante liu la’ós katak profeta nia lian ne’e ema rona ka la rona; buat importante maka profeta hela iha Povu nia leet, lian ne’ebé hatudu Maromak nia dalan sira (vers. 4-5).

Ezequiel realiza integralmente Maromak nia projetu. Simu bolun husi Jahwéh, nia sai, iha Povu desterradu iha Babilónia, lian emak ida husi ne’ebé Maromak apresenta ba nia Povu dalan ba vida nakonu no loos. Ne’e mak profeta nia misaun.

ATUALIZASAUN

- “Profeta sira” la’ós grupu umanu ida mohu tiha ona sékulu barak liubá, maibé realidade ida iha-ne’ebé Maromak kontinua uza atu intervein iha mundu no kria foun fali istória. Sé maka profeta sira ohin-loron? Sira hela iha-ne’ebé?

- Iha Batizmu, ita simu marka profeta nian, tuir Kristu nia ilas. Ita ida-idak iha ninia istória vokasaun profeta nian: ho forma barak Maromak tama iha ita-nia moris, sadik ita ba misaun, husu resposta positiva ida ba ninia proposta. Ita iha konxiénsia katak Maromak bolu ita – dala balu ho forma banál – ba misaun profétika? Ita matan-moris ba sinál sira ne’ebé Nia kari iha ita-nia moris no husi sira Nia dehan mai ita, loroloron, sá maka nia hakarak husi ita? Ita iha ideia katak ita mak “ibun” ne’ebé husi ne’e Maromak nia Liafuan ba to’o ema sira?

- Profeta mak ema ida moris ho nia matan hateke ba Maromak no ba mundu (iha liman ida kaer Bíblia no iha seluk jornál diáriu). Hodi moris iha komuñau ho Maromak no lee Maromak nia projetu ba mundu, no hodi konfronta projetu ne’e ho realidade umana, profeta nota distánsia ne’ebé iha entre Maromak nia mehi no ema nia realidade sira. Iha-ne’ebá maka nia intervein, hodi Maromak nia naran, atu denunsia, aviza, korrije. Ita mak ema sira ne’e, moris iha komuñau ho Maromak no tempu hanesan matan-moris ba realidade sira ne’ebé halo ita-nia mundu iha oin aat?

Iha konkretu, iha situasaun sá de'it maka ha'u simu bolun, lora ba lora, atu ezerse ha'u-nia vokasaun profétika?

- Denúnsia profétika implika, dala barak, persegisaun, terus, marijinalizasaun no, iha kazu barak, mate (Óscar Romero, Luther King, Gandhi...). Oinsá ita hasoru injustisa no buat hotu ne'ebé na'ok ema sira nia dignidade? Ta'uk, komodizmu, baruk-teen, dala ruma impede ita atu sai profeta?

- Presiza iha konxiénsia katak ita-nia limitasaun no indignidade ne'ebé umana liu la bele sai nu'udar deskulpa atu realiza misaun ne'ebé Maromak hakarak konfia mai ita: se Nia husu servisu ida, nia fó mós kbiit atu supera ita-nia limite sira no kumpre buat ne'ebé Nia husu. Frajilidade sira ne'ebé halo parte ita-nia umanidade la bele, iha sirkunstánsia naran de'it, sai nu'udar deskulpa atu ita la kumpre ita-nia misaun profétika iha ita-nia maun-alin sira nia leet.

SALMU RESPONSORIAL – Salmu 122 (123)

LEITURA II – 2Cor 12,7-10

AMBIENTE

Surat Daruak Paulo nian ba Korintu hatudu problema iha relasaun entre Paulo no sarani sira Korintu nian. Paulo nia kritika ba membru balu comunidade nian ne'ebé ladún konsistente ho valór sarani sira (surat dahuluk ba Korintu sira) provoka reasaun maka'as ida no kampaña organizada ida ho sentidu atu dezakredita Paulo. Kampaña ne'e nia hun mak misionáriu itinerante ruma husi comunidade sarani Palestina nian, ne'ebé konsidera an Apóstolu 12 nia representante no minimiza Paulo nia servisu apostóliku. Entre buat sira seluk, misionáriu sira-ne'e afirma katak Paulo inferiór ba apóstolu seluk, tanba nia la moris hamutuk ho Jezús no katekeze ne'ebé Paulo apresenta la iha konsonánsia ho doutrina Igreja nian. Paulo, simu informasaun sira-ne'e hotu, ba lalais Korintu no halo konfrontu maka'as ho ninia inimigu sira. Hafoin, ho fuan kanek, nia retira ba Éfeso. Tito, Paulo nia belun, negosiadór delikadu no diplomata matenek, bá Korintu, atu tenta rekonsiliaun.

Paulo, entretantu, husik Éfeso no bá Tróade. Iha ne'ebá maka nia hasoru Tito, be filafali husi Korintu. Notísia ne'ebé Tito lori fó korajen fali: problema entre sira supera tiha ona no Koríntiu sira oras ne'e iha fali ona komuñau ho Paulo.

Nakonu ho konsolasaun, Paulo hakerek apolojia hakmatek ida kona-ba ninia apostoladu, no tau mós apelu ida atu halo koleta ida ba kiak sira Kreda Jerusalém nian. Testu ne'e maka ita-nia testu Surat Daruak Paulo nian ba Koríntiu sira. Ita iha hela tinan 56 ka 57.

Testu ne'ebé propoin mai ita integra parte datoluk surat nian (kf. 2 Cor 10,1-13,10). Iha-ne'ebá Paulo, ho estilu apaixonadu, dala ruma ho liafuan kro'at, maibé nafatin tanba ezijénsia lialoos no fiar nian, defende ninia ministériu nia autenticidade hasoru “super-apóstolu sira” ne'ebé akuza nia.

Nu'udar apóstolu, Paulo la sente inferiór ba ema ida no menus liután ba ninia akuzadór sira. Sira-ne'e loko an ho sira-nia kredensiál sira no afirma iha fatin hotu sira-nia don karizmátiku sira... Paulo, se hakarak tama iha jogu hanesan, nia bele loko an ho buat barak, hanaran revelasaun sira ne'ebé nia simu no ninia esperiénsia místika sira (kf. 2 Cor 12,1-4); maibé nia hakarak atu sira haree de'it ema frajil no vulneravel, ne'ebé Maromak bolu no haruka atu fó sasin kona-ba Jezús Kristu iha ema sira leet.

MENSAJEN

Hodi asume kondisaun frakeza no vulnerabilidade nian, Paulo ko'alia kona-ba limitasaun ida ne'ebé nia lori iha nia isin, “anju ida Satanás nian” ne'ebé fó hanoin nafatin ba nia kona-ba ninia finitude no frajilidade (vers. 7). Saida loos maka ne'e, iha konkretu? Ita la hatene. Karik bele moras fiziku króniku ida (iha Gal 4,13-14 Paulo ko'alia kona-ba moras fiziku grave ida, ne'ebé halo atu apóstolu nia isin, sai “provasaun” ida ba Gálata sira; maibé laiha buat ida garante katak moras fiziku ne'e liga ho “anju Satanás ne'e” ne'ebé nia ko'alia ba Koríntiu sira). Faktu iha-ne'ebé Paulo bolu limitasaun ne'ebé inkomoda nia “anju Satanás nian” ida kari liga ho faktu mentalidade judaika ne'ebé liga moras ho “espíritu aat sira”. Tuir interpretasaun seluk, “ai-tarak iha isin” katak “anju ida Satanás nian” bele refere mós ba obstákulu sira ne'ebé Satanás tau ba Paulo iha ninia anúnsiu Evanjellu nian.

Iha kazu hotu, Paulo nia problema pesoál hatudu oinsá finitude no frajilidade la'ós determinante ba misaun; buat ne'ebé determinante maka Maromak nia grasa... Ho Maromak nia grasa, Paulo bele buat hotu, maski iha debilidade. Maromak la elimina problema, maski Paulo hato'o pedidu insistente; maibé Nia maka fó forsa atu kontinua ninia misaun, maski iha limite sira ne'ebé “ai-tarak iha isin” ne'e impoin ba nia. Loloos, problema pesoál ne'ebé Paulo terus fó sasin katak Maromak atua no manifesta nia kbiit liuhusi instrumentu fraku, finitu, limitadu sira. Iha apóstolu – ema ida moris ho kondisaun finitude nian, vulnerabilidade nian, debilidade nian – bele manifesta ba mundu no ba ema sira Maromak no Kristu nia kbiit.

ATUALIZASAUN

- Paulo nia kazu pesoál ko'alia barak kona-ba Maromak nia métodu sira... Atu bá hasoru ema sira no apresenta ba sira proposta salvasaun nian, Maromak la utiliza métodu espetakulár sira, kbiit-na'in, boboot, ne'ebé impoin ho forma hanehan nian no husik marka ida admirasaun no hakfodak nian iha povu sira nia memória; maibé kuaze beibeik Maromak utiliza frakeza, debilidade, frajilidade, simplisidade atu halo ita koñese ninia dalan sira. Ita mane no feto sira sékulu XXI nian, fasil liu atu husik ita-nia an impresiona ho jestu boboot sira, ba senáriu magnifisente, hatais elegante sira, ba buat ne'ebé envolve ho nabilan rikusoin nian, ho prestíjiu sosiál nian, ho podér, ho fafurak/beleza; no husi sorin seluk, ita susar liu atu repara buat ne'ebé apresenta an nu'udar kiak, haraik an, simples, frajil, debil... Maromak nia liafuan ne'ebé ohin propoin mai ita fó garantia katak iha frakeza mak hatudu Maromak nia kbiit. Ita presiza aprende haree mundu, ema no sasán sira ho Maromak nia matan no deskobre Maromak ne'e mai hasoru ita no hatudu dalan mai ita iha debilidade, iha simplisidade, iha kakiak, iha frajilidade.

- Konxiénsia katak ninia qualidade no defeitu sira la'ós determinante ba misaun nia susesu, basá buat ne'ebé importante maka Maromak nia grasa, tenke lori profeta atu hamamuk an husi sentimentu loko an nian eh auto-sufisénsia nian. “Profeta” tenke sente nia an nu'udar instrumentu umanu simples ida, frajil no limitadu, no liuhusi nia Maromak nia kbiit no grasa atua iha mundu. Bainhira “profeta iha konxiénsia kona-ba realidade ne'e, nia komprende oinsá irrelevantu no laho sentidu ninia atitude “*star*” nian ka buka protagonizmu, iha realizasaun misaun nian... “Profeta nia misaun la'ós dada ba nia an rasik naroman boot sira atu leno nia (spotlight), kámara televizaun nian ka ema lubun boot nia matan; profeta nia misaun mak sai nu'udar veikulu umanu ba Maromak nia proposta libertadora ba ema sira.

- Nu'udar *background* ba ita-nia testu ita iha Paulo nia polémika ho ema-sarani ruma ne'ebé la simu nia. Iha ninia perkursu misionáriu tomak, Paulo tenke hasoru nafatin inkomprensaun sira; dala balu inkomprensaun sira-ne'e mai husi maun-alin sira iha fiar no membru sira husi comunidade sira ne'ebé Paulo lori ho esforsu maka'as, anúnsiu libertadór Jezús nian. Maski nune'e, inkomprensaun


la doko Paulo nia desizaun no entuziazmu, iha anúnsiu Lia-Foun Di'ak Jezús nian... Nia sente katak Maromak maka bolu nia ba misaun ida no presiza lori misaun ne'e to'o rohan, maski tenke hakanek ka hetan kanek... Dala barak ita tenke hasoru realidade hanesan. Ita hotu koko momentu inkomprensaun no opozisaun nian (ne'ebé dala barak mai husi comunidade laran rasik nune'e, haterus ita liután). Iha momentu sira-ne'e maka Paulo nia ezemplu tenke nabilan iha ita-nia oin no tulun ita atu manán dezánimu no tentasaun atu deziste.

• Iha Paulo nia testu ida-ne'e (nune'e mós iha testu hotu apóstolu ne'e nian), naksira atitude ida moris sarani ida nian iha ne'ebé ba nia Kristu maka loos duni, sentru ba ninia ezisténsia no moris de'it iha funsaun ba Kristu... Laiha buat seluk ne'ebé sai ninia interese se la'ós haklaken Kristu nia proposta sira no fó testemuñu kona-ba grasa maksoin Kristu nian. Fatin sá loos maka Kristu okupa iha ha'u-nia vida? Fatin sá loos maka Kristu okupa iha ha'u-nia projetu sira, iha ha'u-nia desizaun sira, iha ha'u-nia hilin sira, iha ha'u-nia atitude sira?

ALELUIA – cf. Lc 4,18

EVANJELLU – Mc 6,1-6

AMBIENTE



Evanjellu ohin nian konta mai ita kona-ba Jezús nia vizita ida ba “nia rain”. Konforme Mc 1,9, Jezús nia “rain” maka Nazaré, aldeia ki'ik ida situa 22 Km ba loromonu Bee-lihun/tasi Tiberíades nian. Povoasaun ida-ne'e moris ho agrikultura no nunka iha importánsia iha istória judaízmu nian... Antigu Testamentu ignora nia kompletamente; Flávio Josefo no hakerek-na'in rabíniku sira mós la halo referénsia ida ba nia. Pareseke Jezús nia kontemporáneu sira ladún fó konsiderasaun ba nia (kf. Jo 1,46). Maski nune'e, Nazaré maka sidade iha-ne'ebé Jezús sai boot no iha-ne'ebé nia família moris bá.

Marcos haktuir mai ita iha evanjellu ohin akontesimentu ida iha sinagoga. Jezús nu'udar membru ida hanesan sira seluk comunidade judaika nian, bá sinagoga atu partisipa ofísiu sinagogál; no hodi uza ninia direitu nu'udar isaraelita adultu hotu, nia lee no komenta Eskritura sira. Epizósium ne'ebé propoin mai ita integra iha parte dahuluk Evanjellu nu'udar Marcos haktuir (kf. Mc 1,14-8,30). Iha-ne'ebá, Marcos apresenta Jezús nu'udar Mesias ne'ebé haklaken, iha Galileia tomak, Maromak nia Reinu. Iha parte ne'ebé ba husi 3,7 to'o 6,6, Marcos refere liuliu Povu nia reasaun hasoru Jezús nia proklamasan... Hetok “Reinu nia dalan” ba oin, hetok aumenta opozisaun no inkomprensaun sira hasoru projetu ne'ebé Jezús haklaken.

MENSAJEN

Jezús nia hanorin iha sinagoga, iha sábadu ne'ebá, fó impresaun ba mahorik sira Nazaré nian, hanesan mós uluk marka sira ne'ebé iha sinagoga Cafarnaum nian (kf. Mc 1,21-28). Maski nune'e, sira ne'ebé husi Cafarnaum, rona tiha Jezús sira rekoñese ninia autoridade husi Maromak (la hanesan doutór Lei sira-nian); sira husi Nazaré halo konkluzan oioin.

Rona tiha Jezús iha sinagoga, nia maluk rai-hanesan hatudu sira-nia hakfodak ho pergunta oioin... Lia-husun rua ko'alia kona-ba Jezús nia hanorin nia orijen no kualidade; kestaun seluk refere ba Jezús nia asaun sira nia kualifikasaun (vers. 2). Nu'udar kontrapozisaun ba impresaun ne'ebé Jezús husik, sira hanoin kona-ba ninia serbisu no “normalidade” ninia família nian (vers. 3a)... Ba sira,

Jezús mak “badain-ai” ida: la’ós “rabbi” ida, nunka estuda Eskritura sira ho mestre ida no la iha kualifikasaun atu hateten buat sira nia dehan. Husi parte seluk, sira koñese Jezús nia família nia identidade no la deskobre buat ruma estraordináriu. Nia “Maria nia oan-mane” no nia maun-alin sira ema “normál”, ne’ebé ema hotu koñese iha Nazaré no nunka hatudu kualidade esepesiál. Tan ne’e papél ne’ebé Jezús foti no nia hahalok sira la bele esplika tuir ema nia hanoin. Kestaun tuirmai (maski la formula ho modu esplísitu) mak ida-ne’e: Jezús nia kapasidade sira-ne’e mai husi Maromak ka husi diabu? Husi kedas momentu dahuluk, mahorik sira Nazaré nian hatudu atitude negativa no lia-fuan hatún nian bainhira analiza Jezús. Sira la refere ba Jezús ho naran rasik, maibé uza pronome ida atu ko’ali kona-ba Nia (vers. 2-3). Hafoin bolu hodi hatún nia “Maria nia oan-mane” (kostume rai ne’ebá bolu oan-mane hodi refere ba aman no la’ós ba inan). Nu’udar *background* ba mahorik Nazaré sira nia hanoin karik mak akuzasaun ne’ebé tempu ruma liubá “doutór Lei nian” mai husi Jerusalém ne’ebé afirma katak: « “Nia iha diabu/Belzebu,” no “Nia duni sai diabu sira hodi diabu sira nia Na’i ulun nia naran” » (Mc 3,22). Marcos konklui katak mahorik Nazaré nian sai laran-kanek ho Jezús (vers. 3b). Sira hanesan hirus tanba Jezús maski laiha autorizasaun husi mestre sira ne’ebé judaizmu rekoñese, nia kontinua hala’o ninia atividade. Nia kuestiona relijiaun tradisionál, bainhira hanorin buat oinseluk no ho forma diferente husi mestre rekoñesidu sira. Konkluzau: Nia hela iha instituisaun judaika nia li’ur; ne’e duni, ninia hanorin la bele mai husi Maromak, maibé husi diabu. Jezús nia maluk husi rai hanesan la konsege rekoñese Maromak nia prezensa iha buat ne’ebé Jezús dehan no halo.

Jezús hatán ba ninia konsidadaun sira (vers. 4) hodi temi provérbu koñesidu ida. Iha resposta ida-ne’e, Jezús asume an nu’udar profeta – katak Maromak nia manu-ain ida, ne’ebé atua hodi Maromak nia naran no iha mensajen ida husi Maromak atu hato’o ba ema sira. Ensinamentu ne’ebé Jezús propoin la mai husi mestre judaiku sira, maibé husi Maromak rasik; vida ne’ebé nia oferese mak vida nakonu no loos ne’ebé Maromak hakarak propoin ba ema sira.

Povu nia rekuza ne’e tuir liña jerál profeta boboot Israel nian. Povu nafatin hetan difikuldade atu rekoñese Maromak ne’ebé mai hasoru sira iha liafuan no jestu profétiku sira. Maski líder sira, povu husi nia rain, nia “maun-alin sira” no sira husi nia uma rasik rejenta Jezús, ida-ne’e la invalida ninia lialoos no ninia prosedénsia divina.

Tanba sá maka Jezús “la bele halo milagre iha ne’ebá” (vers. 5)? Maromak oferese ba ema sira, liuhusi Jezús, perspetiva vida foun no rohan-laek... Maski nune’e, ema livre; se sira taka an iha sira-nia eskema no prekonseitu egoísta sira no rejenta moris ne’ebé Maromak oferese, Jezús la bele halo buat ida. Biar nune’e, Marcos observa katak Jezús “fó isin diak ba ema moras balun de’it hodi tau liman ba sira”. Provavelmente, “ema-moras sira-ne’e” mak sira ne’ebé hatudu abertura ba Jezús, maibé la iha korajen atu tesi kotu ligasaun ho mekanizmu relijiozu judaizmu nian atu deskobre novidade radikál Reinu nian ne’ebé Jezús haklaken.

Marcos nota mós Jezús nia “surpreza” ba ninia konsidadaun sira nia fiar-laek (vers. 6a). Nia hein sira hodi konfronta an ho proposta liberdade foun no vida nakonu nian ne’ebé oferese, ninia interlokutór sira sei hakribi moris atan nian no hakohak ho entuziazmu realidade foun... maibé sira prefere moris-atan tuan nian duké novidade libertadora husi Jezús. Maski buat ne’e la fó ksolok, nia la impede atu Jezús kontinua propoin Lia-Foun Di’ak Reinu nian ba ema hotu (vers. 6b). Maromak oferese, laho interupsaun, ninia vida: ema presiza de’it simu ka lae ninia presente ne’e.

ATUALIZASAUN

- Testu Evanjellu nian repete ideia ida ne’ebé mosu iha testu rua seluk domingu ida-ne’e nian: Maromak hatudu an ba ema iha ninia frakeza no frajilidade. Normalmente, Nia la hatudu an iha kbiit, iha ukun, iha kualidade sira ne’ebé mundu hanoin nu’udar exelente no ema sira admira no foti nu’udar maromak; maibé, dala barak, Nia mai hasoru ita iha frakeza, simplisidade, debilidade,

kakiak, iha situasaun simples no banál sira, iha ema haraik an no pretende-laek... Ita presiza interioriza Maromak nia lójika, atu ita la lakon oportunidade atu hasoru Nia, komprende ninia dezafiu sira, simu proposta vida nian ne'ebé Nia halo mai ita...

- Elementu ruma ne'ebé sai kestaun iha epizósiu Evanjellu nian mak atitude taka an nian ba Maromak no ninia dezafiu sira, ne'ebé mahorik sira Nazaré nian asume. Sira sente kómodu metin iha sira-nia serteza no prekonseitu, nune'e deside katak hatene buat hotu ona kona-ba Maromak no katak Maromak la bele horik iha badain-ai simples nia moris ne'ebé sira koñese didi'ak... Sira hein Maromak ida forte no kmanek-ba'in, ne'ebé tenke impoin ho tarutu boot no halo inimgu sira hakfodak ho ninia kbiit; no Jezús la tama iha perfíl ida-ne'e. Sira prefere renunsia Maromak duké imajen ne'ebé sira harii tiha ona kona-ba Maromak. Iha-ne'e soi konvite ida atu ita la taka an iha ita-nia prekonseitu sira no eskema mentál sira ne'ebé define no haloot didi'ak, no atu purifika nafatin an, iha diálogu ho maun-alin sira ne'ebé partilla fiar hanesan, iha raronak kona-ba Maromak nia Liafuan no iha orasaun, ita-nia perspetiva kona-ba Maromak.

- Ba mahorik sira Nazaré nian, Jezús ne'e "badain-ai" de'it, ne'ebé nunca estuda ho mestre boot sira no ninia família la'ós família boot ida; tanba ne'e sira la nakloke atu rona Jezús – ne'ebé sira koñese ho modu perfeitu, julga no kataloga – ne'ebé lori buat ruma foun no oinseluk... Ida-ne'e tenke halo ita hanoin kona-ba prekonseitu sira ne'ebé, dala ruma, ita uza atu hakbesik maluk sira, julga sira, kataloga sira ka tau etiketa ba sira... Ita nia julgamentu sira loos iha forma ita julga sira? Keta ita-nia prekonseitu sira impede ita atu simu maluk ida no rikusoin ne'ebé nia lori?

- Jezús asume an nu'udar profeta, katak ema ida ne'ebé Maromak konfia misaun ida no ida-ne'ebé fó sasin iha maun-alin sira nia leet Maromak nia proposta sira. Ita-nia identifikasaun ho Jezús halo ita sai kontinuadór/a misaun ne'ebé Aman konfia ba Nia. Ita sente ita-nia an hanesan Jezús, profeta ne'ebé Maromak bolu no haruka ba mundu atu fó sasin proposta libertadora ne'ebé Maromak hakarak ofere se ba ema tomak? Iha ita-nia liafuan no jestu sira hatudu proposta salvasaun nian ne'ebé Maromak hakarak halo ba ema hotu?

- Maski iha inkomprensaun husi ninia konsidadaun sira, Jezús kontinua, iha absoluta fidelidade ba Aman nia planu sira, atu fó sasin iha ema sira ni aleet kona-ba Maromak ni aReinu. Maski iha Nazaré ema rejeita Nia, Nia bá, hanesan ita-nia testu dehan, nia ba tiha knua sira besibesik atu hakalekn Reinu nia dinámika. Sasinvne'ebé Maromak bolu ita atu fó dala barak kumpre iha inkomprensaun no opozisaun nia laran... Dala barak Jezús nia eskolante sira sai dezanimadu no frustradu tanba sira-nia sasin la hetan aseitasaun ka komprensaun.... Jezús nia atitude konvida ita atu nunca dezanima ka deziste: Maromak iha ninia projetu sira no hatene oinsá nakfilak frakasu ida ba ézitu/susesu ida.